

佳山堂詩集

一
集

乐府

明堂篇

礼乐被八荒，天子坐明堂。
东封长白山，南谕交趾王。
怀柔遍北极，渥洼入西凉。
直諫四门辟，玺书征贤良。
渐陆无逸羽，乞言罗酒浆。
骚人赋两都，国体重柏梁。
慨焉念前代，徽猷未举扬。
弘文开紫禁，词苑列三长。
凤凰声嘒嘒，梧桐发高岗。
明诏下列郡，逸书毋得藏。
尽出石渠秘，琬琰陈两厢。
将以深鉴戒，岂止重文章。
赤管赐近臣，龙宾启芬芳。
阐幽述盛烈，直笔忠佞详。
大哉纶綍宣，此举实辉煌。
班马讵足匹，千秋扬耿光。
勿以私害义，斯民念否臧。
大典副诚难，奉命宜恐皇。

白日行

白日照空谷，寒风折旧枝。
行旅半藏匿，跨马边州儿。
边州纷虎豹，僮僮三五连。
仓猝两相遇，抽箭正当弦。
当弦意气殊，释弓入酒垆。
叱咤绝恒态，不读一行书。
读书何区区，盈盈府中趋。
隐隐张公子，娟娟明月珠。
明珠出远邸，陆离彩无比。
婉转一朝间，入君怀袖里。
怀袖岂久长，弃掷少辉光。
君心不可料，贱妾泪成行。
泪下谁复闻，役使苦纷纭。
主人索我履，小姑索我裙。
裙成不上要，履成不作根。
君看束缚去，畴能不断魂。

扶南曲歌词八首

其一

美人正华年，朱楼大道边。
风来吹衣袖，香落疑九天。
日暮鸣箏坐，含情私自怜。

其二

郎骑桃花马，妾着石榴裙。
绣陌香吹雨，巫山岫贮云。
箫声双引凤，一气不能分。

其三

面绣双鸳鸯，背绣迴文字。
为郎裁作襦，出入芬怀次。
愿郎反覆看，露出思君意。

其四

羡君贵为郎，出入有辉光。
珥笔趋金殿，题诗下建章。
朝回一并坐，尚带御炉香。

其五

葛萝附松柏，缠绵竟忘形。
君非三春草，妾非九秋萤。
雨露无偏滋，根下孕茯苓。

其六

皓齿扬清歌，绿珠未足多。
晚风动银蒜，双持金叵罗。
曼声知曲变，倚玉两相和。

其七

明珠玉搔头，玲珑双凤衔。
发膩钗复滑，侍婢卷珠帘。

步步烦郎顾，相随笑道盐。

其 八

京兆风流惯，深闺擅画眉。
妆成每闲坐，徙倚待郎归。
章台多巧笑，莫令频蹙惟。

登高丘而望远海

登高丘、望远海。
浩瀚廓无垠，波涛接崔嵬。
扶桑不可攀，瑶华若为采。
尾闾泻渺茫，盈虚閤光彩。
橐籥或至微，吾欲问真宰。
顾念道里遥，岁月倏已改。
迈征岂不力，常虞集尤悔。
龟勉继前修，佩纷以兰茝。
凤饥不妄食，鹏运奚所待。
望古期遥集，坚贞得爽垲。
鄙哉博望查，庸愚互相给。
七襄虚跂次，支机果安在。
所以钓濑人，孤往如不逮。
客星亦寻常，小舟自歛乃。

公无渡河二首 有序

梦中有人投予《公无渡河行》二首，复有一人据案改削，亦未详其为何许人。醒而录其一，次首不复记忆，因援笔足之。

其 一

公无渡河，公竟渡河。

鼉鼉得人如猛虎。

鱼鳖跳舞，怒涛如山暗。

银浦金支，翠羽在何许。

我歌捉搦歌，微月坠沧波。

公无渡河，公竟渡河。

其二

公无渡河，洪波浩淼，日月倾仄。

巨舰虽高，敌不得鳖鱼之腹。

横千里白骨，如山贪未已。

回车顿辔乐田溪，卑栖覩时如伏鸡，人生荣枯安可齐。

昆吾虽云利，慎莫恃剗犀。

战城南

战城南，短兵接。

血流没髀气，不惜盘龙刀。

缺矢集，面目眦裂尽。

光如电，夙矢忠义报君恩。

马革有无何足论，人拾断羽将军字，鸢啄遗骸烈士魂。

日光暗兮黑云合，雨色凄凄风萧飒。

旧时部曲半存亡，马嘶丹旌犹蹴蹋。

元戎不动屹如山，六博高歌意气闲。

双鬓醉拥封侯骨，待画麒麟奏凯还。

从军行五首

其一

从军有苦乐，仲宣陈其辞。僭窃尚如此，况乃王者师。

大将奉天威，偏裨亦光辉。建功万里外，仗节锦衣归。
诿意贼负险，三年缺斧斨。城上虽乌啼，疆圉亦已荒。
刍粟输吴越，道路阻且长。衣裳不暇制，衔枚仍戎行。
我兵勇战斗，狡贼工匿藏。鲸窟几时尽，潜焉心悲伤。

其二

丈夫志封侯，吴钩不去身。
结束事戎马，英气冠群伦。
每战必歼敌，论功后两甄。
不仁不可为，匪义曷由取。
婉辞谢众人，归以报明主。

其三

群丑非我敌，望纛先溃遁。
谋猷贵式固，勿徒争尺寸。
冒进惭承突，糜饷愧贾贩。
利或贪得亡，兵以妇人钝。
主者未嗔喝，位卑何敢论。

其四

兵以毒天下，天子圣且仁。
临轩谆告诫，痍瘝实切身。
吾徒备武略，慈惠众所亲。
君看军中舞，剑气动若神。
电光盘旋合，寒威震四邻。
妙在不伤物，舞罢四座春。
此中有至理，尔我常书绅。

其五

滇黔抗我师，鸱张势自削。

不烦黑虎力，行见凶徒缚。
我归未云久，永有室家乐。
人情大抵同，伍员入楚宫。
忿师兵不戢，遂失霸王风。
秋杜诗有作，君王赏不薄。
试观将帅臣，几人画麟阁。

长干行

生长长干里，不识长干路。
婉娈嫁夫婿，仍是对门住。
少小相携手，今日别离久。
芳草有时歇，君行音书绝。
欲问羞向人，含凄对明月。

短歌行二首

其一

君不见，秦时渭水鱼大上，轻车重马皆东向。
黔首苦战争，贵贱增惆怅。
烦苛法令细如毛，狐书鸿鹄志尤豪。
十日大索不可得，领徒复见亭长逃。
之罘小篆纵如故，烟霞功德两俱误。
贪说蓬莱日月长，倏忽晷杳已南徂。

其二

君不见，刘表游宴呼鹰台，亦是平世三公才。
顾厨已尽何足问，英雄割据且徘徊。
鹿门识龙凤，风云向谁开。

千里须骐驎，诂云驾驽骀。
荆州沃野天下少，江东诸子殊草草。
赤壁一炬未足奇，欲话兵机吾已老。

行路难三首

其一

长安豪贵起大屋，日食万钱苦未足。
洛阳年少来上书，旁观笑破绛灌腹。
昔日信陵谋孔艰，车骑喧阗老抱关。
太史犹记东门里，过者徘徊不忍还。
呜呼！蹶屣担簦日三喟，人生报恩会有地。

其二

少年结交意气豪，杯酒欢娱赠宝刀。
出门一笑轻其曹，铭钟铸鼎等鸿毛。
白日暍暖不相待，霜刃绣涩沉光彩。
无复伏波铜柱勋，空愁薏苡飞书在。
呜呼！茫茫尘氛无要津，弃繻破浪属何人。

其三

纫兰不耐久，磨刃空伤手。
树锻既不堪，犊鼻亦可丑。
丈夫悬弧志四方，焉能跼蹐徒俯首。
脂车秣马越太行，自信险阻无掣肘。
我车脱辐，我马卒瘕。
前有虺蛇，后有猛虎。
将伯无助，困于林莽。
咄嗟歌白石，慷慨问青旻。

孰知坎壤蓬蒿士，亦有当年稷契臣。

湘妃怨

渺渺洞庭水，云雾递隐见。
不闻帝子来，愁绝鸾车宴。
兰蕙杳难求，虚传杜若洲。
木落湘痕浅，斑深竹影秋。
鱼龙徙窟宅，月明汀沙白。
烽火逆浪过，拏芳断行迹。
兰挠何时集，凄以鲛人泣。
瑟罢不须弹，日暮烟波立。

弃妇词

君看花作叶，莫看叶作花。
花作叶，妾意藏深篋。
叶作花，君情委泥沙。

荷锄行二首

其一

荷锄往田，虎挾其藩。
食人不可禁，两子备一步。
妇惊匿土菴，颜色稿如木。
出者幸得全，归来已成独。

其二

日午如燎，我锄伊赵。

望饁不来，俾我心扰。
薄言往迎，筐筥在途。
粗粝半倾，傍有啼鸟。
启户阒无人，泪下肝肠摧。
传说谁家妇，不上歌姬台。
颈血一以溅，闾里共悲哀。

枯鱼过河泣二首

其一

尾颡日已久，行役无休息。
愧不为鲛人，泪下犹堪织。

其二

腹内不得食，一居谁复假。
远徙恐弃捐，尚有垂钓者。

子夜四时歌四首

其一

欢去方浴蚕，繰车声齿齿。
遗茧化为蛾，生子已满纸。

其二

采荷挹荷露，清香气如许。
怅望不见人，与荷相尔汝。

其三

舟人半夜起，共言秋水长。
谁家欢新到，门前正停桨。

其四

薰笼薰我襦，薰笼薰我袜。
薰笼薰我衾，卧处如霜月。

兴元行

兴元复，巴山好作屋。
好作屋，多贮粟。
谁家荡子去从军，不肯食粟食人肉。

乌生八九子

乌生八九子，昼夜啼相呼。
常虞祸患至，不克保其雏。
毛羽幸长成，暇豫乃吾吾。
乐极悲斯生，突与鹰隼俱。
饕餮其恒性，攫取恣腹腴。
老乌救不得，兀坐终集枯。

隔谷歌二首

其一

白日荒荒夜未央，奸人卖我去远方，无衣无食摧肝肠。
岂无亲故难以告？哀救我来救我来。

其二

兄体肥壮，弟瘦露骨。
病卧道旁，白日西没。
呼兄不见，气细如发。

定武功

皇帝十三载，贼臣乱纪纲。
鞭长觊不及，狡焉思启疆。
庙算赫斯怒，下令饬戎行。
将军从天降，楼船奋鹰扬。
戈甲蔽原野，金鼓震潇湘。
天道原助顺，妖星远掩芒。
其众鸟兽散，崩角远相望。
汤网开三面，尧仁宥一方。
爰命偏师，捣彼益梁。
歼厥渠魁，资我军粮。
王者无战，天威莫当。
闽海清兮两粤平。
金马碧鸡，冥顽弗灵。
六师奋武，入其中崩。
缚取遗孽，献俘以惩。
六合无尘，皇心克宁。
念生民之涂炭；悯禁旅之远征。
慎选贤良，抚绥生成。
五大不在边；五细不在庭。
相彼雨雪，先集维霰。
览古准今，可为永鉴。

采莲曲

女伴相招邀，横塘采莲子。
荡舟深浦去，鸳鸯双飞起。
怀抱自廻纡，低头拂绣履。
忘却所持荷，擷解堕寒水。
同伴携抱归，素手弄晴晖。
露下沾襟袂，日暮心转微。

捣衣曲

白露滴金盘，念彼征夫寒。
抱缣下阶砌，力怯倚阑干。
拂砧举素腕，遥望银河烂。
岂是支机石，相思岁已晏。
捣衣不停手，肝肠断已久。
掩泪卷衣去，梦魂听刁斗。

独漉篇

独漉独漉，兰生空谷。
王者之香，岂羨华屋。
丈夫远期，白日西驰。
功业不建，畴则间之。
太行匪险，笑言是检。
我实寡术，不能自贬。
佐饔者尝，佐斗者伤。
桃李成蹊，不言自芳。
蜂毒莫并，虎尾莫履。

鉴于未形，而况哆侈。
朝露易晞，刈葵伤根。
俟其自化，与为无垠。
攫金于市，众皆云可。
我为顰蹙，其祸则那。
太丘道广，群情所安。
言葆其素，思我故欢。

君马黄

君马黄，臣马骊，与君纵辔夹道驰。
臣以下驷，当君上驷，一输两赢那得知。
驰马当御道，取金两裆垂。
旁睨者谁？子骑奴鞭莫迟归。
去入新宫，众雌罗一雄。
君王有敕旨，犹在梦魂中。

将进酒

将进酒，乐复作，皇帝千秋万万岁。
天地清宁，雨暘时若。绵绵瓜瓞，百世本支。
非其种者，锄而去之。祯符臻，万宝成。
朝无佞谀，雕凿来庭。
圣人戒慎如履冰，乃歌伐木咏鹿鸣。
嘉宾燕衍，神听和平。
荒裔始知有日月，闾阎始乐有父兄。
翠葆缤纷兮鹭羽下，击鼓坎坎兮肆夏。
觥筹交错兮莫辍工。歌既醉兮卜夜。
合坐兮促卮。声容盛兮令名垂。臣拜稽首兮戩谷。
以天下之乐为乐兮乐无涯。

倒载干戈兮蒙之以虎皮。

仙人好楼居

沧溟湧三山，郁郁遥相望。
 云端耸杰构，珊瑚高十丈。
 飘渺鸾凤舞，去天真尺五。
 日月互吐吞，蛟龙蟠柱礎。
 白玉为门阙，珠光鉴毫发。
 仙人时过从，游戏忘岁月。
 我来寻赤松，适遇安期生。
 饮我以琼浆，邀我游赤诚。
 笙镛正迭奏，天乐忽中停。
 上帝有敕旨，饥饿悯顽冥。
 无食致叱离，父子各东西。
 骨肉委虎豹，含凄不敢啼。
 雉罹于兔网，李树代桃僵。
 葛藟不庇根，蓬飞无定乡。
 紫府多旷逸，功罪炳如日。
 恫瘝与世隔，岂能免罚黜。

燕歌行

寒露降，木叶稀。
 白日曛，失光辉。
 念子阻河梁，涕下沾裳衣。
 灼灼黄金，艳艳歌舞。
 铜雀台，西陵土。
 鸳鸯七十旧成行，溱沔冰结多豺虎。